

張文襄公電奏

張文襄公全集卷七十七

電奏五

致總署督辦軍務處

光緒二十一年正月初一日  
亥刻發

威海戴孫兩軍以少擊眾力挫賊鋒洵爲難得惟孤軍  
恐難持久援軍緩不濟急不得已或有兩策一由東撫  
李電飭該軍曉諭榮城登州一帶居民各集團練義勇  
協助官軍擊倭民國雖不能擊其大隊只須晝夜多方  
擾之伺便截其糧餉軍火亦可稍殺賊勢以待援兵如  
民團擊倭出力奏免錢糧三年假如賊久踞登州一帶  
錢糧豈復爲我有哉一請北洋大臣李電飭海軍就現

有鐵艦快船四五號疾駛至成山頭一帶頃刻可到襲其運兵運械接濟船及游弋之船得利則進如彼大隊來追收至威海船臺相輔倭必受傷威海得力在礮臺故倭避水路而襲陸路使我礮臺無用若使海軍數船擾之則正可引之使來臺下受我礮耳彼若用水師攻臺賊船雖多半皆是運船不能破我臺也半年來賊船終不敢近威海其情可見或慮戰敗船燬不知威海若失海軍已無老營寥寥數艦然後賊從容圍攻終歸不支趁此時威海礮臺未失趕緊用之猶有萬一之望不然臺亦不能久存矣若彼來攻臺我輔以數艦則是

一臺變爲數臺一艦變爲數艦也惟懇朝廷以重賞嚴  
罰激勵各船員弁方能出奇制勝此舉似乎孤注然事  
機危急斷無束手受攻之理此乃審敵情盡人事實非  
孤注用此兩法或可緩敵勢以待援兵耳戴孫兩軍勝  
仗如東撫查確似可卽請朝廷優獎以作士氣大局至  
此憂心如焚謹抒愚昧之見以備采擇是否有當恭候  
朝廷裁度曷勝惶悚請代奏元旦

此電發後并致天津  
李中堂煙臺李撫台

李撫台來電

光緒二十一年正月初三日未刻到

電奏兩策理實確鑿可行鐵艦不用以攻敵不知何  
計以保全可笑可恨近日朝命亦屢飭兵船乘間出

擊如能照憲台所議水陸交攻事必有濟竊慮格不能行耳言之慨然民團協助官軍亦可稍殺賊勢衡已密飭舉辦威海除海軍外陸軍二十營無不離心離德爲統領者猾且怯無將略又喜邀功所陳戰事不盡可據當萬難之勢與此等人共事焦憤欲絕刻下強敵壓境不得不委曲調和衡惟感之以誠持之以正引其責於已以期萬一獲勝耳蒙電奏江南李占椿陳鳳樓各軍半月後方能到惟賊勢太衆我軍太單恐難支持半月有負憲台統籌全局之心如何如何舊屬秉衡謹肅冬

致總署來電

光緒二十一年正月初四日卯刻發

湖北銀元局廠屋已成機器已到齊不日安竣卽須開鑄因開辦後端緒甚繁尙須籌款銀元銷路以江南安徽等處爲多查鄂省創設各廠已奉旨仍令洞督飭經理且江南去年曾經議設銀元局尙未舉辦若鄂局歸南洋經理可免江省另設一局以致相妨將來如有盈餘可酌量津貼鄂省因與護湖廣總督譚電商譚意甚以爲然復電稱銀元局歸江南並允協濟餘利於鄂甚有益囑卽電奏等語謹請旨遵行請代奏支

致總署

光緒二十一年正月十一日丑刻發

事機日緊用繁餉竭捐借極難江蘇擬借洋款一百萬  
鎊約合銀七百萬兩供北上諸軍及本省海防糧餉軍  
火轉運各費因戶部電不令動關稅還只可勉力籌維  
由鹽課釐金認還或有他項籌捐之款亦可湊補但必  
須海關出票戶部立案由藩司運司按期撥還此款爲  
北軍用者不止一半將來由戶部核明如係北軍用者  
酌派沿江各省攤還除江蘇省首先多攤外安徽江西  
湖北湖南四川五省亦酌分等差協攤江蘇用者江蘇  
自還惟以後除京餉照舊解足外協餉應請酌減現有  
英商熾大洋行來議借款息六釐九八扣不另取行用

輕省殊多因戶部電與赫德借款有礙故與德國德華銀行議借先議七釐息九六扣以外別無行用現與議六釐息其扣數須照赫德辦法分二十年還利隨本減惟據英商熾大言該行有現成鉅款無論借多少無須招股與赫德借款無礙等語查熾大較赫德少扣九釐計每百萬鎊省九萬鎊合銀五十餘萬兩如部借三百萬鎊可省一百六七十萬兩旣云與赫款無礙自宜擇善而從以免耗費江蘇借款擬先與熾大議并由總署戶部詢之赫德如赫德必以爲不便卽與德華定議至借款之數較上年十二月嘯電增多者因前電漏未將



購外洋槍礮核計再戶部既不准動關稅還未便代臺灣借合併聲明仰懇勅下戶部總署迅卽核議電復以濟眉急而維大局不勝翹切待命之至請代奏真

總署來電

正月二十光緒二十一年七日巳刻到

奉旨張之洞前奏擬借熾大洋行之款本日經總理衙門戶部會奏已依議行矣現在關內外各軍需餉甚鉅尙須預爲籌備源源接濟如熾大尙可續借或他行有照此辦法出借者著張之洞設法妥辦湖北槍礮廠何時可以開工每月約可造快槍若干著查明具奏欽此

致總署

光緒二十一年正月十七日卯刻發

中國戰艦幾盡海面全爲倭據彼以數船游行南北毫無顧忌我沿海八省備多力分斷不能處處皆有精兵利械旣難制勝餉亦不支南北轉運亦多荊棘即使能遏其深入亦不能斷其接濟彼活便我坐困大局愈危除迅速購船之外再無良策初九日奉電旨飭籌搗敵游弋各事宜仰見聖謨宏遠實深欽服南洋現有之木殼四兵輪船薄行遲礮無新式將弁難求實無大用斷難出洋懇請朝廷迅速決計不惜巨款速購穹甲快船五六艘大雷魚礮船十數艘雇募洋弁洋兵率之來華

選中國健將勁卒佐之粵將宜多用并購公司船數號  
爲運船方能行駛迅速隨戰艦同行公司船每艘可載  
兵千餘此軍游行海面斷不可專守一處惟此時買船  
甚難卽重價亦難多購查北洋已遣洋人補海斯岱赴  
美洲購船多隻又聞漢納根在阿堅廷國購定鐵艦快  
船各一艘此兩船擬請撥歸南洋再由洞添購數艘方  
可勉強成一隊竊謂南洋所購者宜自爲一軍與北洋分  
爲兩枝督飭整頓方能各專責成如倭船攻北洋則南  
洋一枝攻長崎各島或截其運船如倭船攻南洋則北  
洋一枝攻朝鮮等處或截其運船只須我有兵船十數

艘在東洋南洋海面游行無論能戰與否倭必處處顧慮自防其國來華之兵必不能多軍火必不能接濟無阻此費約需銀兩千萬然倭正猖獗必不肯罷兵若再深入所損豈可數計卽肯罷兵索費亦必不止數千萬安危所繫斷不宜惜較之徒養陸勇數百營耗費多而不能制敵者勝之多矣至此舉惟有另借大批洋款撥付尤望早爲定計伏候聖裁敕遵以便設法覓購或擇其較小可速成者酌量訂造但使大局穩固則中國二十省每年籌還一百數十萬金實不爲難再此後北洋購船等事仰懇可否一併諭知南洋旣可通籌合力

且免定購兩歧同此增價亦可免互相等待以致遲誤  
此事洞夙夜焦思舍此實無補救之法疊經電奏想廷  
議因費鉅未卽舉辦今時勢危急不得不披瀝再陳不  
勝屏營急切待命之至請代奏洽

總署來電

光緒二十一年正月二十九日亥刻到

奉旨張之洞電奏已悉威海被陷北洋戰艦盡失若  
欲重整海軍自非另購鐵快等船不可惟需費甚鉅  
卽借用大批洋款亦未易集事漢納根所購鐵快各  
一船現經王大臣議與訂定將來此船到華卽可撥  
歸南洋先行調遣此外購船先須籌有款項著張之

洞卽在上海等處洋行商訂借款電知戶部總署奏  
明辦理如集有成數卽設法購船以備海洋禦敵之  
用欽此效

致總署

光緒二十一年正月二十二日午刻發

洋將郎威理前在北洋兵船教練精勤號令嚴肅各輪  
技藝皆有可觀因各輪船將領多係閩人結黨排擠辭  
差回國此事中外人人皆知今欲急練海軍以爲遠圖  
非得力水師大將不可惟該洋將相宜此人現在英國  
爲水師副提督必須許以高官重任方肯舍之而來擬  
請由總署令赫德速致該員一電召其回華告以當用

明  
為南洋水師提督蓋外洋視水師提督極重或可鼓舞  
効命中國除北洋外閩粵長江皆有水師提督權位皆  
不比外洋之重似無所妨請旨遵行請代奏養一

致總署

光緒二十一年正月二十二未刻發

畿防日緊運道尤危現雖趕籌調募勇營不過補苴尙  
非長策必須在中原練有重兵一大枝方可以備緩急  
而維全局查洋將漢納根在津練兵之議早已中止聞  
德國洋商言該洋將閒住意似無聊當囑該商電詢願  
來南洋否但南洋局面甚小只能練一萬人此乃為該  
洋將轉面子之意昨接覆電願照辦查洋將性情既須

量能授權又須示以限制漢納根曾在大東溝苦戰出力自是有用之才因待之甚優所欲遂奢今閒住日久遂又稍就範圍擬調該洋將來江差委令其在徐州練兵一萬以備北省緩急雖不能卽求速效此軍練成後必有大益其練兵營制餉數詳細章程俟該洋將到江後洞再與細商奏明辦理總之欲用洋將必須令歸外省督撫節制鈴束斷不可令徑達總署及督辦軍務處方能聽用如蒙俞允請發交洞處差委當由洞電知北洋遺其來江商辦請代奏養二

總署來電

光緒二十一年正月二十三日戌刻到



奉旨張之洞兩電均悉漢納根練兵之議所費不貲  
是以中止現在尙有經手購辦槍礮船隻等事未便  
調往琅威理向在海軍甚得力前經總理衙門飭令  
赫德函商來華管帶海軍副據覆稱在英已授實職  
不能前來應毋庸議欽此

致總署

光緒二十一年正月二十三日子刻發

長江提督彭請派已革提督沈茂勝爲分統又記名提  
督鄧正峯現在粵記名總兵丁大文現在程提督文炳  
行營洞擬調該二員來江帶勇與粵督李及程提督均  
商妥相應請旨將沈茂勝鄧正峯丁大文三員均調赴

江南交洞差委實於防務有裨請代奏漾一

致總署

光緒二十一年正月二十三日子刻發

前奏准令湖南婁提督雲慶練湘軍數營備用現因海  
州喫緊需營甚急已電知婁提督令部將總兵杜嵩齡  
統五營來江餉由江南出計原有四營新募一營此後  
擬請旨仍令婁提督於本省防營之外募練五營備用  
婁本部原有三底營係來省巡防之用湘多伏莽不便  
撤動此備調之五營應另外計算調出外省時餉由外  
省發在岳州時餉由湖南發湘省防營餉章每營每月  
止二千餘金五營爲數無多湘省似尙可籌查南北各

省或設防添營或籌協餉械或辦過路兵差需費皆屬  
浩繁湖南皆無此事若每月僅費一萬餘金以協助大  
局似亦義所宜然蓋練軍備調既整齊且迅速勝於倉  
卒烏合者遠矣可否敕下湖南巡撫提督照此辦理之  
處伏候聖裁請代奏漾二

總署來電

光緒二十一年正月二十四日戌刻到

奉旨張之洞兩電均悉沈茂勝鄧正峯二員著准其  
調赴江南差委丁大文一員現在程文炳營中此時  
畿輔防務緊要正在需人之際著毋庸調往婁雲慶  
所募湘軍現經張之洞飭令杜嵩齡統帶五營前赴

江南仍令婁雲慶募練五營備用著咨商湖南巡撫  
辦理欽此敬

致總署

光緒二十一年正月二十三日亥刻發

二十二日電旨恭悉馮提督子材募粵勇十營自欽州  
由內地行本月十九日抵廣東三水縣計由北江舟行  
至南雄過庾嶺復舟行至九江再乘輪東下至鎮江須  
四十日請代奏漾三

致總署

光緒二十一年正月二十四日卯刻發

近畿諸軍雖多其中出色將領固不乏人然恐未必各  
軍皆是勁旅不無過慮必須速調得力之軍入衛以備

緩急竊查廣西右江鎮總兵現署廣東陸路提督張春發前在鎮南關卓著戰功爲王德榜部將之冠洞所深知上年七月洞曾電奏請飭募軍北上爲粵省奏留查粵防重在虎門黃埔各礮臺尙有水師提督鄭紹忠爲粵人所倚倭斷無暇擾粵京畿尤重似可令該提督統原有之四營并添募共成十營率之北上入衛該署提督係帶湘軍順道過湘卽可招募又雲南臬司岑毓寶前隨滇督岑征戰多年岑故督深資其力堅定深穩深悉洋戰情形該司部下曾經出關將弁不少熟習地營似可令募勇十餘營迅速東下總之張岑兩軍洋戰皆

有閱歷征倭必能得力距京雖遠若令北來於大局總  
有裨益敬陳管見是否可行恭候聖裁請代奏敬

總署來電

光緒二十一年正月二十七日巳刻到

奉旨朕欽奉 皇太后懿旨張之洞向來辦事實心  
近覽迭次電奏於料敵籌備事宜亦多可采軍事方  
殷張之洞務當不分畛域通籌大局將籌款購械選  
將籌兵等事設法妥辦俾戰守有資用副朝廷倚任  
之意欽此宥

致總署戶部

光緒二十一年正月二十六日亥刻發

熾大借款事前接戶部正月十五日咸電熾大借款可

卽定等因當卽飭該洋行來江甯定立合同先回滬令上海道蓋印又携來江甯蓋藩司總督印該行請將所奉諭旨寫入合同二十二十二二十四等日已屢電請戶部速奏請旨今尙未奉到電旨洋行不肯簽字該行今日來云原議六日卽須畫押今逾限欲回滬改議并索行用二萬鎊詞氣甚不平現設法婉留竊思此事係遵照戶部咸電議定一切利息期限行用條款早經電奏并電復戶部在案悉照原議似無游移事機萬緊敢請戶部總署卽爲代奏仰懇聖恩俞允由電諭知以便早定合同提銀如軍務早定此款餘存仍可撥作別

用斷不至率行支用不勝惶悚待命之至請代奏宥

致總署

光緒二十一年二月初一日申刻發

正月二十六日電旨恭悉現與熾大洋行議尙可續借二百萬鎊並允減爲五釐息九四扣此外別無行用等語此與六釐息九八扣者又較輕省惟再借務懇聖恩敕部由各省關認還江蘇實無此力至湖北槍礮廠節奉十二月十七日電旨卽飭確查本議定正月底開工因去年槍礮被火改造鐵房廠屋鐵梁柱等件未造齊去臘中旬拉鐵料之大轉軸忽斷另鑄開槽甚爲費事現趕工限二月底將廠屋作好三月初必可開工初



造人器不相習每月止出五百枝三箇月後可月出千枝請代奏東一

致總署

光緒二十一年二月初一日亥刻發

湖北槍礮廠初造不能多出難應急需戰事方殷惟有向外洋訂購可多可速近接龔使電倭人所購洋軍火除已運外未起運者尙餘價值六十餘萬鎊之貨等語查此數合銀四百數十萬兩倭寇凶悖貪狠不惜巨款購械其意在與中國窮兵苦戰可知斷不肯卽行罷兵洞反覆籌思萬不能不廣備利械以維大局且倭戰皆恃利礮我僅用槍尙難制勝現與各洋行商妥墊辦槍

礮不必現銀或兩年還或六年還酌給息銀或年息六釐或年息六釐半專購德國小口徑毛瑟快槍一種其他式各國快槍一概不買以免淆雜各行共允每月包出兩萬枝以後可以源源供用不絕八十日包運鎮江貨到付銀其中間有先付價五分之一者快礮就現有者訂購一百餘尊此外亦允每月供新造之輕小快礮數十尊機器快礮數十尊其墊辦緩價亦與快槍辦法同現暫與議定一箇月辦法以後體察事勢如需用再與續訂洞愚昧之見兵多不如械精輕小快礮一分鐘可放三十餘出機器快礮一分鐘可放一千餘出每營

有快礮十尊則一營可抵十營之用兵少易練將少易選械少易檢點修理並可節餉需免騷擾故購快礮尤爲今日戰事要著購械之費雖鉅不能不權其輕重是  
否有當伏候聖裁訓示請代奏東二

總署來電

光緒二十一年二月初四日子刻到

奉旨張之洞兩電俱悉熾大續借金磅已令戶部速議具奏快槍快礮實爲行軍利器張之洞現與洋行商妥墊款訂購一切辦法均著照所請卽行訂定爲  
要欽此江

致總署

光緒二十一年二月初四日辰刻發

現委長江水師千總金滿卽黃金滿募陸勇三營水勇一營防通州海門一帶該弁樸質勇往故破格委用惟官階太小擬請聖恩可否賞給都司銜以資彈壓又據長江提督彭咨派已革提督沈茂勝分統四營已蒙恩准惟並無頂戴難資統率懇奏請酌賞頂戴等語擬懇聖恩可否暫行酌量賞給頂戴如軍務完竣並無勞績仍請撤銷恭候聖裁再江西候補道惲祖祁安徽差委總兵王心忠在籍提督王金榜均已與江西撫安徽撫商允調來江甯擬請旨准將惲祖祁王心忠王金榜三員調來江南差委請旨遵行請代奏支

總署來電

光緒二十一年二月初五日亥刻到

奉旨張之洞電奏已悉長江水師千總金滿著賞加都司銜已革提督沈茂勝著賞五品頂戴江西候補道惲祖祁安徽差委總兵王心忠在籍提督王金榜均著准其調赴江南差委欽此歌

致總署天津李中堂

光緒二十一年二月初四日午刻發

前接北洋電云英教士李提摩太自言有救急之法已電總署奏明奉旨不妨一試等因查該教士屢向洞言亦與致北洋電同既奉旨一試當即再約該教士來甯詳問語多閃爍除最謬之語駁斥不論外大意言此時

惟有設法懇英助中國方能支持問如何方肯助李云  
須多與英國商務利益如准英商在中國開鐵路開礦  
興各項化學工作製造等事此皆中國大有利益可致  
富強之事無如中國拘於積習舊法憚於變法大舉工  
商拙鈍貧窘不解興利又無貲本官亦無大力籌此鉅  
款以致坐棄大利若與英國議定准其在中國辦二十  
年每年所出之利酌量分與中國二十年限滿後仍交  
還中國自辦風氣已開始基已立中國官民工商皆曉  
其作法知其好處自能擴充接辦從此中華爲強國矣  
當詰以二十年太久答云或十數年又詰以設不交還

奈何答云外國此等辦法條約多有從無不還者又詰以英以何法助中國答云極力勸和不使倭人妄爲詰以能助水師陸軍幫我攻倭乎答云不能助兵只能脅和並云此係該教士爲好之意自出已見至如何辦法如何立約英廷所重者何事究願如何幫助須總署與英公使中國星使與外部自行商辦等語稅務司穆和德來言大意相似惟增入添口岸一條詰以許英利益設各國欲均霑將如何答云英商務最大不患他國分其利等語查兩人所言皆係懸揣之詞總歸於以利益與英則英可助中國脅和以洞管見論之無論英俄法

德美何國此時能助我水師攻戰則我必勝倭必感中國自可重許以利益如以上諸條皆無不可國威能振寇讐能殲尙復何所吝惜若能允以勢力脅倭使其和平罷兵不索地不索重費則我酌量許以利益亦無不可若僅空言勸和則何必徒以利益與他國乎惟幫助脅利必須及早趁此時和局尙未開議之時方易爲力若待大局糜爛倭欲愈奢又加各國乘機要求則雖助亦無益矣應否令與總署英使外部商酌之處恭候聖裁遵旨詢問覆陳請代奏豪一

致總署

光緒二十一年二月初四日亥刻發



傳聞倭有索臺灣開鑛十年等語未知確否即使倭真有此意朝廷權衡至當知亦必斷然不允查臺灣極關緊要偏近閩浙若爲敵踞南洋永遠事事掣肘且雖在海外實爲精華地廣物蕃公家進款每年二百餘萬商民所入數十倍於此未開之利更不待言去臘洞託寓居美國之道員容閱借洋款容復電云若肯以臺灣作押可借美國銀元十萬萬元等語查美銀元每元合中國銀一兩餘十萬萬元是值銀一千餘兆又上海英律師丹文來言若中國需銀可以臺灣押與英人可借鉅款等語洞以其語不得體當卽峻詞斥之卽此兩說可

見外洋各國豔羨重視臺灣之至既知洋情如此不敢  
不以上陳再近日倭有數輪游弋澎湖顯係意在臺灣  
甚屬孤危可慮竊謂此時正可就外洋豔羨之意另設  
一權宜救急之法似可與英公使外部商之卽向英借  
款二三千萬以臺灣作保臺灣既以保借款英必不肯  
任倭人盜踞英必自以兵輪保衛臺灣臺防可紓借款  
還清英自無從覬覦臺灣其權在我如照此辦法英尙  
不肯爲我保臺灣則更有一策除借巨款外并許英在  
臺灣開鑛一二十年此乃於英國家有大益之事必肯  
保臺灣矣臺灣內山瘴毒深邃歷年開闢無效是中國

人力斷然不能深入若英人代我開山通道廓清瘴癘暢開地產彼雖獲目前之利至年限滿以後我坐享其利矣我有巨款即可速購各小國現成兵輪於戰事必有大益而既許英以鑛利則保臺必所樂從中英之交既深即可與英外部密商遇事從中暗助總之英遠倭近英緩倭急英乃強鄰尙存大體倭乃凶盜毫無天理古人所謂遠交近攻此理確然不易惟外間耳食之人恐誤以爲將臺灣押與英國橫生訾議不知歷年借洋款皆寫海關作保我借款已清英國何嘗有據我海關而收稅之事乎大局十分緊急謹陳管見上備采擇不

勝惶悚是否可行伏候聖裁請代奏  
豪二  
另致天津李中堂加致總

署電錄呈一覽八字餘同

致總署  
光緒二十一年二月初十日辰刻發

軍報最關緊要由京城達外省之電綫設有阻滯必誤事機宜多設一兩條乃爲周妥查湖北襄陽老河口久已通電似宜將此綫接通陝西由商州達西安或由襄陽達潼關保定至京似亦宜多設一綫不必繞由天津擬請飭北洋大臣速酌辦請代奏蒸

總署來電  
光緒二十一年二月十一日酉刻到

奉旨張之洞電奏由襄陽至京另設電綫等語本日

已據王文韶奏明辦理矣前據張之洞電奏以臺灣作押借用洋款藉資保衛一節經總理衙門詢之總稅務司據稱各國均守局外勢不能行該督所奏究竟有無確實辦法著詳細電復欽此真

致總署

光緒二十一年二月十三日午刻發

押款保臺一節奉旨詢問確實辦法竊思惟有探詢外部方能得其真際洞已電龔許兩使照兩豪電所陳探詢英俄外部意思或保臺或多與利益如開鐵路內地開鑛興商務工作等事肯用勢力助我脅和否並探詢英俄另有何欲令其自言作爲洞之私見空論如朝廷

以爲可商懇電飭龔許兩使籌商方能切實與議是否有當恭候聖裁請代奏元

致督辦軍務處

光緒二十一年二月十三日午刻發

威海倭寇已退惟踞海中之劉公島蓋岸上礮臺已毀彼踞島已足以扼北洋我岸上步隊無如彼何明係盡撤陸兵併力北擾以致關外諸軍皆敗畿防甚急丁槐一軍曾經洋戰自宜令迅速入衛昨電商東撫李所見亦同請代奏元

致督辦軍務處

光緒二十一年二月十三日未刻發

前奉電旨會商擣巢殲寇一節往返屢商之洞意擬購

穹甲快船數艘合漢納根兩艘并趕造極快魚雷礮船  
十艘再購極快公司船三艘改爲運船載兵兩千人載  
煤數千頓隨之乘虛攻襲步隊登岸或毀其臺礮或殲  
其守兵或焚其積儲敵內地之兵大至及敵輪還救則  
移攻他處若海面遇敵船少則攻船多則避遇其運兵  
運械之船則截奪之我船駛快敵不能追敵若窮追則  
收入閩之長門浙之鎮海粵之虎門江之吳淞等處皆  
有礮臺蓋兵少則不能深入煤少則不能在海外久停  
船少則不能擊其大隊只在乘虛多擾截其運船彼有  
內顧之憂自不能起傾國之兵深入久擾至造船到華

至速須七八箇月購船到華較早駛行不快極快雷船  
必須定造購船多少未定造船已有成議惟選將難得  
其人景崧意欲招粵邊悍勇游匪數千先用民船潛往  
如有兵輪隨後繼進意在深入攻踞惟募練亦須四箇  
月須有巨餉利械兩人所擬辦法不同之洞意總謂民  
船難往竊擬分投各自籌辦俟勇齊船到再看情形商  
酌臺灣練成此項勇無論攻倭與否總是有用餉械江  
南籌濟至購船定船詳細辦法另行電奏謹遵旨覆陳  
請代奏之洞景崧同肅元

致總署督辦軍務處

光緒二十一年二月二十一日  
午刻發



外洋新運到快礮數十尊擇其輕便行營可用者先儘  
關外諸軍前敵而敢戰者撥給以應急需撥馬克遜兩  
磅半子快礮六尊格林礮十尊解提督唐仁廉軍撥馬  
克遜快礮十尊解將軍依克唐阿軍撥馬克遜快礮十  
尊解幫辦宋慶軍又史高德快礮六尊及鄂厥自造快  
礮彈二千解幫辦湘撫吳軍各礮皆隨有彈江省專派  
員弁押送飭令加價雇車兼程前進惟各彈笨重太甚  
車恐不敷此係東征軍械請敕東征轉運局備車隨時  
協濟趕運各快礮須有教習方解施放須有機器匠方  
能裝潢修理若無教習機匠皆不能用查北洋通曉洋

軍火之人不少威海向設有學堂今想散處并請敕北  
洋大臣及東撫迅速選撥訪尋在津等候每營派教習  
機匠數名與礮同往尤爲切要請代奏馬一

致總署督辦軍務處

光緒二十一年二月二十一日申刻發

關外諸軍挫退畿防日緊不能不急籌大將勁旅爲入  
衛之師查提督馮子材一軍三月初可到江南本令其  
紮寶山縣之獅子林海口茲擬令先紮鎮江配給軍火  
操練如彼時京畿事急卽令率所部十營渡江北上赴  
援又湖南提督婁雲慶部將杜嵩齡來詢悉婁提督精  
神甚健忠勇奮發現與函商令其速募湘軍十營備調

如北事緊急卽令該提督親統此十營輪載來江配給  
餉械亦由清江北上婁現駐岳州有長江水師岳州鎮  
張捷書同城張穩練熟習如有急婁可卽行交張暫護  
從容再由鄂督選員奏署如蒙俞允當再電商護鄂督  
預爲籌計惟馮勛望素高似不便屬他人節制以免爲  
難合併聲明再婁練軍事奉旨令與湘撫商查去年洞  
原奏准練六營護湘撫王以餉絀只允添練三營今練  
營更多若再商必仍以餉絀爲辭徒致延誤現擬除湘  
省原案營數餉數外餘新增者俱江南供餉至奉調出  
征日十營餉全由江南發給請代奏馬二

總署來電

光緒二十一年二月二十三日戌刻到

奉旨張之洞電奏已悉現在畿輔防軍數已不少遠道徵調需餉浩繁新招之勇亦難得力該督擬令婁慶雲募營入衛著毋庸議馮子材一軍俟到江南後應否令其北上再候諭旨欽此濛

致總署

光緒二十一年二月二十二日午刻發

奉初七日寄諭以碭豐接壤豫境土匪聚眾劫掠嚴飭捕拏解散查此案係福匪王三去臘在碭山蕭縣邊界行劫拒捕竄至河南永城定期豎旗起事當經洞電飭署徐州鎮程孔德徐州道沈守謙派隊追剿務速撲滅

現據該鎮道電已於本月十一日在蕭縣黃家口將此股撲滅匪首王三已格斃復斃匪數十名生擒多名惟山東濮州鄆城一帶有土匪傳帖蠢動半係土匪半係關外逃回勇丁內多有後膛洋槍其爲潰勇無疑除飭徐州文武營團嚴防相機剿捕並電東撫迅飭撲滅外謹先由電覆陳請代奏養

致督辦軍務處

光緒二十一年二月二十九日卯刻發

奉正月二十六日 上諭欽奉懿旨飭洞務當不分畛域通籌大局將籌款購械選將籌兵等事設法妥辦俾戢守有資等因欽此悚惕莫名洞庸愚迂陋渥荷聖恩

當此大局緊要之時斷不敢存畛域之見惟有欽遵竭力籌辦特是事機緊急廟謨宏遠外間多未知悉竊思籌辦一切必宜及早遲則無及不揣冒昧可否仰懇將朝廷規畫大端遇有飭知北洋大臣之事一併電飭南洋知之俾得殫竭愚慮或豫爲籌辦或籌擬上陳冀以仰副恩命是否可行伏候聖裁請代奏豔一

致總署督辦軍務處

光緒二十一年二月二十九日卯刻發

聞倭要挾太甚議恐難成前接龔照瑗王之春電英俄皆云須倭要挾太過時方能發公論此時倭既有要挾條目似宜電龔許兩使令見俄主英主及外部懇其相

助伏候聖裁請代奏豔二

總署來電

光緒二十一年三月初一日亥刻到

奉旨張之洞電奏懇將朝廷規畫大端凡飭知北洋  
事併飭南洋知之等語前奉懿旨令該督通籌戰守  
原指餉械兵將而言至機宜重要必須慎密北洋事  
務自有專司焉能事事飭南洋知之所請著毋庸議  
又電奏倭人要挾太過請電英俄相助等語兵力脅  
和總署與英俄使臣屢商不允龔照瑗王之春迭次  
電奏英俄亦但許勸助并無屆時可以發兵之語何  
以電張之洞有此言著鈔錄原電復奏欽此東

致督辦軍務處

光緒二十一年二月二十九日卯刻發

海州防務喫緊而山東曹濟土匪勾結游勇蠢動且正與運道相近目前轉運軍火爲最緊要之事大道絡繹日夜不絕運件太多護送兵勇不敷周轉設被土匪劫奪爲害非淺且轉運遲滯焦急萬分洞電檄嚴催派員添局百方催趲仍難迅速總由天津與清江南北相距太遠中途無人督察籌辦以致正月半之械至今尙未到津若專派大員亦費周章不揣冒昧竊擬一策查東河總督衙署在濟甯每年本應赴濟甯一行河督許任事有才曾在軍營明習兵事現值黃河水小河工無事



設令許暫赴濟甯以南一帶擇要駐紮暫行兼管轉運事宜應需車馬及護送督催等事隨時督察相機變通轉運自可較速本標原有河兵酌帶若干或撥豫省勇營歸其調度或酌募數營遇有土匪隨時撲滅設倭寇自日照贛榆海州一帶登岸圖截運道有大員駐彼督率各營防剿亦較得力此舉似爲一舉兩得即使土匪不熾倭氛不擾於轉運必然有益且濟甯係河督轄境即使有赴濟甯以東防剿之事相去亦不甚遠洞因欽奉正月二十六日上諭懿旨飭令不分畛域通籌大局設法妥辦故敢竭其愚慮上陳以備一說有無可采恭

候聖裁不勝惶悚請代奏豔三

總署來電

光緒二十一年三月初一日亥刻到

奉旨張之洞二十九日電奏已悉海州防務喫緊山東曹濟土匪勾結游勇蠢動現值轉運軍火駱驛不絕護送兵勇不敷誠恐運道有阻關繫匪輕張之洞擬請飭許振禕酌帶數營赴濟甯以南駐紮兼管轉運剿匪事宜惟振禕督辦河工責任綦重現在桃汛將屆未便遠離著李秉衡遴派明幹大員酌帶勇營前往濟甯一帶擇要駐紮凡有南來軍火應需車馬及護送督催等事飭令迅速辦理遇有土匪隨時撲

減以清運道并著張之洞松椿督飭局員一律催趲  
運解俾無遲滯欽此東

致總署戶部督辦軍務處

光緒二十一年三月初一日申刻發

熾大款初次議定百萬鎊立合同後該洋商富因治卽  
回滬已由領事蓋印訖電知適已奉續借二百萬鎊之  
旨正擬速訂富旋於二月初二日來電須該行自回英  
辦理當晚卽附輪回英有事託代管事人米師麗代爲  
照料發電據米云富因治三十日可到英其人甚可靠  
到後數日卽可提銀並力攬續借二百萬鎊之事仍照  
前議五釐息九四扣辦法三日前尙來電催立草合同

以初次款尙未著實令暫緩目前富因治尙無到英電  
信因富行後恐此事不妥又令上海道劉麒祥詢英商  
有恆行鹽道胡家楨詢英商麥邊行另委員詢德商德  
華行皆云須照戶部在匯豐借款辦法六釐息八九扣  
毫無活動意各行一詞目前餉需萬緊北軍催餉甚急  
而海州贛榆一帶增兵戒嚴各營正待發餉局存已罄  
捐借甚微焦急萬分查熾大之事顯係將合同定後始  
回英招股能否招集實不可必惟有暫與他洋行議借  
以濟眉急但洋行無論何家息扣斷難比匯豐減少擬  
暫與議借二百萬鎊辦法總與戶部所借匯豐之款一

律仰懇聖恩允准迅賜由電諭知洞當相機酌辦如他行議有眉目而熾大確電已來銀可提到則息扣較多之款卽作罷論若數日後熾大之銀仍不能提則是事涉懸虛卽與此行借定百萬鎊若遲久仍無準信再與借定一百萬鎊但可稍爲減省斷不肯多借息扣較重之款目前軍情消息不佳若再遲緩恐雖重息亦不肯借關係大局非輕至洋款合同無論何項認還洋人俱置之不問總須寫明各口海關認還以後儘可聽戶部分派外省自當遵照此時戶部似可不必詳細核計如何攤還以免延誤仰候聖裁訓示不勝迫切請代奏

東

總署來電

光緒二十一年三月初五日已刻到

奉旨張之洞電奏借款一事熾大之議無成著准其再行商借惟數目不得過多應以數百萬兩爲斷其利息期限均照匯豐辦法已飭戶部電知矣欽此

致總署

光緒二十一年三月初二日卯刻發

奉初一日電旨飭錄龔照瑗等原電復奏等因欽此查洞原奏只云英俄皆云須倭要挾太過時方能發公論并無發兵字樣或係傳電訛舛况公字下文有論字若公字誤爲兵字則論字難解矣龔照瑗來電云外部云

究不知倭願何在既派使赴倭俟倭言出再爲公論等語許景澄來電云俄主允如議和時倭索太過可約英法勸其退讓等語王之春來電云兩浼俄頗慌發難而憎倭驕允於李議被勒時約鄰力助等語謹遵旨錄電復奏請代奏冬

致總署

光緒二十一年三月三日卯刻發

廿九日電旨恭悉海州距清江近關繫運道誠恐倭寇窺伺洞於正月內卽經電奏調岳州婁提督雲慶部將杜嵩齡帶原有並添募共五營來防海州隨卽欽奉寄諭嚴防海州青口等處又飭總兵王得勝募海州勇五

營防青口飭總兵王心忠募江北勇五營防清江沅陽  
近日接漕督及海州文武函電倭輪兩隻由山東日照  
來到青口灌河口等處探水貼僞示以利誘漁戶合作  
嚮導不久必來滋擾查杜嵩齡一軍內有新募一營二  
月下旬甫到齊二十六日點驗成軍二十八日卽催起  
程又楊文彪五營本係派往圖山關礮臺換防正將啟  
行江北陸路旣急江路當較緩只可先其所急亦派赴  
海州并調駐江陰南岸之林保黃守忠兩軍粵勇共七  
營一并赴海州合力相機防剿王得勝甫成軍已到防  
楊林黃三軍到防均須十日以外王心忠之軍募成到



防須二十日以外已飛催現今官紳嚴查沿海漁戶懸重賞以緝奸細諭以大義勿爲賊用謹將防守海州清江情形先電陳請代奏江

總署來電

并致山東李撫台清江松漕台  
十一年二月二十九日寅刻到

光緒二

奉旨前據松椿電奏倭船在海州探水電催張之洞將前調五營又添派二營迅飭到防并暫留山東衡字一營協防當經降旨允准本日據李秉衡電稱有倭船二隻在安州海面探詢海州青口沂州路程海州去清江不遠運道所經餉械皆萃於此必當加意嚴防著張之洞迅催前派七營剋日到防駐守李秉

衡電稱已抽撥隊伍前往協防并著迅速開拔松椿  
前留衡字一營如不敷用卽會商張之洞酌量添調  
以資分布欽此勘

致總署

光緒二十一年三月初三日申刻發

奉二十七日電旨飭婁雲慶先帶練軍三營起程並委  
員添募數營隨後啟行等因欽此當卽電知護鄂督譚  
並婁提督遵辦惟婁部防軍本止一營半共七百五十  
人去冬奏准募練三營備調因海州防務喫緊經洞奏  
明調此三營並舊有防軍一營是已練之軍共止三營  
又囑新募一營湊成五營來江已於正月濛電聲明在

案因待新募故二月下旬始到江已赴海州是婁部現已無營可撥二月馬電曾聲明令募十營備調在案目前須新募成軍方能北上昨接婁電卽速募須月餘等語擬卽催其募就迅卽起程一面籌餉寄往謹縷晰陳明請代奏江

致總署

光緒二十一年三月初十日申刻發

庚電奉旨恭悉臺危待濟自應力籌前數日已將上海存槍儘數撥一千六百餘枝彈一百餘萬交臺輪解往近又索神機礮彈亦竭力撥解此後如有購到之械當盡力撥濟臺有二輪最速尙可設法探避此外覓船接

濟之法當設法訪籌至調兵輪一節南洋除最劣之輪外止木質四兵輪船薄行遲每一點鐘止行十海里又無快礮在長江依輔礮臺尙可協助若戰於海上敵船圍攻追擊徒供糜碎有損於江無益於臺而中國從此無一兵輪矣東撫電倭船全赴南洋海州喫緊寇蹤剽忽崇明通州亦甚可慮若兵輪全無更爲棘手臺灣宜救洞夙夜焦思每日通電力之所能毫無吝惜惟實在爲難情形不敢不據實上陳請代奏蒸

總署來電

并致閩粵已刻到

光緒二十一年三月初九日

奉旨現在奉天直隸山東倭允停戰二十一日而彼

方圖攻臺灣不在停戰之內該處孤懸海外如被敵困無法援救尤慮軍火缺乏難資戰守本日據唐景崧電奏請飭粵省撥可用後膛槍五千枝配足子彈另撥毛瑟彈三百萬粒火藥十萬磅交知州唐鏡沅設法運臺著李瀚章速卽撥解以應急需并著張之洞譚鍾麟一併酌量籌撥或用漁船暗渡或雇洋輪保險分起運往趁此敵兵未集之時趕緊辦理俾資接濟至唐景崧請調兵輪赴臺聽用并著張之洞李鴻章酌量調派欽此庚

致總署

光緒二十一年三月十三日卯刻發

王藩司之春暨楊宜治自巴黎來電有西紳行厥允訂  
新大鋼甲一足比鎮定頭號快船三連魚雷管鋼甲快  
船二大魚雷船二運兵戰船二共十船礮彈齊水師照  
額約誓密訂三月內運華決勝商爲墊款收船署券廿  
年清還兵任我去留統費二百萬鎊此事由宜治與編  
修宋育仁與紳行密商驗確已電總署春覆查事尙可  
行紳已晤詢候立合同竊思戰固解懸和亦有用乞酌  
定電奏再另有德大鋼甲船二戰船三事同俟款議定  
再電等語竊思購船最爲今日急務數日來百計訪詢  
總苦於現船難覓且選配水師將弁尤爲難事今王之

春等所稱既有大批現船又肯配足水師包運資我征戰到華期亦頗速似極妥善正月十九日奉旨重整海軍自非另購鐵快船不可購船先須籌款著卽商訂借款電知戶部總署奏明辦理如集有成數卽行設法購船以備海洋禦敵之用等因欽此王之春等令洋商墊款購船可免另借之周折來電戰固解懸和亦有用二語極爲扼要惟十船止一鐵艦力尙不厚如能再墊款添購來電所云之德大鋼甲二艘魚雷礮船數艘似尤完備倭人如知我購到戰船精械甚多知中國尙能力戰卽和議亦當易於就範如蒙俞允當再電商王之春

妥辦是否有當請代奏請旨遵行元

致總署

光緒二十一年三月二十一日子刻發

前奉旨令婁提督雲慶北上江南撥數營帶往當經電  
鄂轉咨茲護鄂督譚咨接婁咨復已將舊案原有之借  
調軍三營防軍一營共四營募齊又添募兩營餘正分  
募撥餉到即啟行等語查江省防軍大枝全赴海州清  
江一帶上游實無可分撥且江軍亦係新招未久向來  
將領皆謂自募得力不肯帶他人營竊思婁既自募似  
可勿庸另撥惟停戰期已將滿和議如何數日即定可  
否稍緩數日如以後仍有戰事即電催婁統已有之軍



速行如已罷兵即可停止以免徒費餉需是否有當抑應如何辦理之處請旨遵行請代奏馬

致總署

光緒二十一年三月二十一日亥刻發

馮提督子材統粵軍十營日內到齊暫紮鎮江馮來金陵面商擬即日輕騎由清江馳赴海州察看地勢軍情後仍回鎮江如海州有警即調所部十營親赴海州前敵督剿本日已行竊思此時馮赴海州一看亦甚有益如海州有戰事即令馮總統節制海州及清江一帶諸軍以護運道清江正係北上之路海州距清江三站如諭旨別有調派之處隨時遵旨辦理請代奏馬

致總署

光緒二十一年三月二十二日申刻發

購戰船募水師搗倭事前接總署皓電云元電已進呈  
此事現暫緩辦自當遵照惟本日接王使之春來電云  
十船皆近年造首號鋼甲三百廿八英尺又鋼甲三百  
五六十英尺皆堅又快船雷艇皆速必有濟磨價待定  
泊智利阿根延海係無約國例不阻統率須大將適前  
水提琅威理賦閒願自効幫華使並任募招兵官并兵  
二千密襲倭和成聽用兵費一年及辦事先須銀約三  
十萬鎊現與英商格林密行訂借三百萬鎊長息五釐  
六扣此款成允借大款歸并此款故較匯豐爲廉船事

不令該行與聞款事已立草約乞速請旨告歐使電該行卽交銀聽撥此款匯豐頗嫉已探龔稍遲恐梗等語既據言之確鑿有兵有將有款且一年用費亦不多尤好在琅威理肯效力誠爲難得機會不敢不飛速上聞恭候聖裁如朝廷以爲事宜緩辦亦懇恩准調琅威理酌帶洋兵弁來華整頓南洋水師借款息扣甚輕所謂六扣當卽九四扣無論購船與否尤可先定擬請旨令總署卽告歐使速電該行南洋用一百萬鎊卽不另借餘二百萬鎊聽候戶部撥用是否有當候旨遵行請代奏養

致總署

光緒二十一年三月二十六日午刻發

聞和議各條不勝焦灼痛憤倭寇狂悖至此種種顯然利害中外諸臣必已懇切陳奏無待洞瀆陳其中如旅順不交還及威海劉公島駐兵天津駐兵各條尤爲可駭查旅順威海乃北洋門戶若倭不退還則北洋咽喉從此梗塞以後雖有水師何處停泊何處修理旅順劉島常駐倭船天津又駐陸兵近在肘腋旅順到津沽山海關皆一日到煙臺尤近彼日肆要挾稍不滿欲朝發夕至且倭約各條貪苛太甚臺灣民悍不甘屬倭必然啟衅各省軍民必然痛恨深怒斷不甘心稍有支節彼

卽謂不依條約立刻生事彼時戰不及戰守不及守和  
不及和卽欲暫避亦不及避倭性凶狠不比西洋其禍  
豈堪設想查要挾各條之害聖明豈有不知朝廷所以  
勉爲和議者不過爲保全京城根本姑冀目前粗安徐  
圖補救若照倭索諸條更是自困自危之道雖欲求目  
前旦夕之安亦不可得又洋報有與中國聯合以備戰  
守一條大略是爲中國經理各省機器製造局鐵路等  
事尤爲險詐查購買洋械本難常恃幸各省尙有數局  
可造槍礮彈藥稍資接濟經此倭事創鉅痛深正須急  
籌鉅款極力擴充運兵鐵路亦須量力修造今若令倭

干預則內地軍火運道皆在倭掌握之中水師旣不能  
再振陸軍亦不能自主中華何以立國且倭踞威旅則  
自遼陽以至威海榮城周廻二三千里處處水陸皆須  
永遠設防所費太鉅當此賠款鉅萬之際經費將從何  
出至蘇杭織絲綢川楚織紗布則各國亦必效尤改造  
土貨中國工商生計從此盡矣海軍無歸宿陸兵無利  
器威旅棄則京畿無屏蔽商民貧則軍餉無來源各國  
欺陵人民嗟怨外患迭至內變將作恐係大學士李鴻  
章昏迷之際李經方等冒昧應允竊惟遣使議和乃朝  
廷休兵息民之盛德顧全大局之苦衷洞雖愚蒙亦知

仰體斷不敢爲大言迂論以瀆宸聰所慮者京城不能  
安和議不能成不論遠患先有近憂伏望聖明熟思深  
察可否敕下王大臣等迅速會議設法補救以候聖裁  
但此時總須乞援方易措手惟有速向英俄德諸國力  
懇切商優予利益訂立密約懇其實力相助問其所欲  
許以重謝絕不吝惜無論英俄德酬謝若何其去中國  
較遠總較倭患爲輕此時先懇各國公同告倭令其停  
戰議約以便從容籌辦尤爲緊要迫切上陳萬分惶悚  
請代奏宥

致總署戶部

光緒二十一年三月二十六日酉刻發

江省需款緊迫正月二月疊次奉旨准借洋款近於三月內又奉旨准借數百萬兩前經向英德各行籌商已久近接龔使電稱已與英國克薩行借定一百萬鎊周息六釐九零五折外無費用二十年還前五年付利後十五年本利併還龔已簽約准三日內交十萬鎊查江省用繁餉竭捐借之款早罄分防江海陸數千里南北新舊百數十營又有礮臺兵輪洋弁等費以及租買運兵輪船多隻北路分設轉運十三局月需數十餘萬購礮械在外爲數尤鉅支應局款早罄皆係挪借甯蘇兩處各庫各局款及東征糧臺款積欠各營各局及各



洋行者纍纍催領催還日日逼迫洞及司道實無從籌措搪抵士卒嗷嗷洋行責誚令人難堪目前非有洋款萬難支持和議雖有眉目然恐尙有更變防務一時斷難鬆懈即使將來裁撤亦須從容斟酌斷不敢輕率貽患至已欠之款不能不付竊思二十四日奉旨將來南洋需用款項由戶部另行籌議自係指整頓海軍購船等事而言至現在急需前經三次奉旨准借洋款龔使與洋商久已議有成說現已經龔使簽字立約未便失信仰懇天恩將此一百萬鎊准其借用由鹽課釐金籌捐等項歸還不動關稅且匯豐事龔使深知龔在英立

約自必與匪豐無妨況數止一百萬鎊斷不致礙總稅  
司所借鉅款洞當督飭司道核實撙節動用如防務早  
定仍可餘存斷不致糜費耗盡至王之春擬借之款已  
遵旨電王作爲罷論謹披瀝上陳請代奏宥

總署來電

光緒二十一年三月二十九日午刻到

奉旨張之洞電奏請借款等語南洋需款旣經龔照  
瑗訂定英商克薩行一百萬鎊卽著准其借用嗣後  
恪遵前旨不得再借欽此勘

致總署

光緒二十一年三月二十六日亥刻發

王使之春來電倭要盟索全臺不應則慮北犯應則粵

聞必譁而臺民亦未必帖然無計可紓宸慮竊采西人公論以普法之戰普索法之阿勒撒士及樓阿來那二省法不得不應惟引西例凡勒佔鄰土必視百姓從違普不能駁至今二省德法兩籍相參財產皆民自主華可援近案商倭等語乞代奏春叩敬等語謹照轉請代奏宥

張文襄公全集卷七十八

電奏六

致總署

光緒二十一年四月初二日辰刻發

倭約萬分無理地險商利餉力兵權一朝奪盡神人共憤意在吞噬中國非僅割占數地而已所有棄臺旅之害威海劉島駐兵之害與中國聯合備戰各條之害二十六日電奏已詳陳近聞通商條目賠款限期尤堪駭異各省口岸城邑商業工藝輪船處處任意往來任意製造一網打盡工商生路盡矣倭在華製造土貨亦照洋貨納稅各國效尤如何能拒釐金虧矣賠款二萬萬

兩六年付清又加五釐利息卽借英國洋款轉付分期攤還每年亦須還本息一千數百萬兩各海關洋稅空矣今借款係赫德一手承辦專借英款將來無論如何搜括亦不能還清英國必索我地方作抵是又生一患矣民貧極則生亂釐稅去則無餉陸師海軍永不能練中國外無自強之望內無勦匪之力矣威旅之兵必致永遠不撤京城亦永無安枕之日矣一倭如此各大國援例要挾動以窺伺京城爲詞更不能拒後患不可勝言矣然非藉兵威不能廢約此時欲廢倭約保京城安中國惟有乞援強國一策俄國已邀法德阻倭占地正

可乘機懇之乞援非可空言必須予以界務商務實利竊思威旅乃北洋門戶臺灣乃南洋咽喉今朝廷旣肯割此兩處與倭何不卽以此賂倭者轉而賂俄英乎所失不及其半卽可轉敗爲功惟有懇請敕總署及出使大臣急與俄國商訂立密約如肯助我攻倭脅倭盡廢全約卽酌量劃分新疆之地或南路回疆數城或北路數城以酬之並許以推廣商務如英肯助我則酌量劃分西藏之後藏一帶地讓與若干以酬之亦許以推廣商務外洋通例若此兩國有聯盟密約有戰事卽可相助不在局外之例俄現有兵艦三十餘艘在中國海面

英有兵艦二十餘艘在中國海面俄英兩國只須有一國允助其兵船已足制倭而有餘其船或開向橫濱長崎或徑趨廣島或游行南北洋兵船一動倭歛立沮倭極畏西洋斷不敢與俄英開戰若俄英有一國相助則兵不血刃而倭約自廢京城自安若倭敢戰則我擊其陸兵英俄截其海道攻其國都倭必滅矣同一棄地而捐荒遠之西域可保緊要之威旅全膏腴之臺灣且可盡廢一切毒害中華之約權其輕重利害顯然且遼東旅順國家根本臺灣歸化康熙初年而西域開拓藏衛大定則在乾隆中葉先後緩急亦自不同譬如人有疾

病臺灣割棄威旅駐兵咽喉之病也內地處處通商賠款力不能還心腹之患也西藏邊遠髀肉之損也蓋俄英本強然歷次條約尙無吞併中國之意卽以重利酬之於彼有益於我尙無大損倭專心欲害中國正苦餉力不足若此約允行則從此旣強且富是我助以吞噬中國之資矣至倭約各條處處包藏禍心而字句巧黠意圖含混尤望將和議各條發交王大臣等細心閱看自知其險毒之謀矣此因和議已許割地故擬爲此權宜轉移之策冀以救急紓禍憂憤迫切仰候聖裁請代奏冬



致總署

光緒二十一年四月初三日戌刻發

前洋報言法德俄阻倭割地適王使之春抵法特電囑  
與外部密商探其所欲告以必有酬謝頃接復電云奉  
豔電屬密商外部春當浼勘界西友往商西以事可商  
不須酬問奉旨否春以洞意浼再往據復俄法聯集水  
師兵力已厚自可脅倭減約俄已不許遼東法應續阻  
臺灣倭未必遽從法俄擬約德合力詰責無慮英人袖  
手此事至密告華政府勿稍洩漏恐不利於華爲華計  
先宜以各國不允索地新約未便互換藉此延宕倭有  
外迫必難持久如此則將來地可歸華若約已換則各

國分地於倭與華無涉以後華患更大云語由私述至外部尙未晤談一切不能盡商須有旨方便登答庶與駐使無礙等語法旣如此關切且俄僅阻遼法願阻倭割臺尤爲難得機會王之春機警敏捷亦有決斷長於應對龔使較爲和緩且現不在法國可否請旨密飭王之春就近切託外部囑其力阻倭割臺遼并採其欲許以厚謝一面暫宕力託各國展限換約庶可挽回事關大局安危機不可失伏候聖裁不勝惶悚請代奏江

致總署

光緒二十一年四月初五日亥刻發

初三日電奏計已進呈頃王使之春江電云頃赴外部

約言德向助日因俄法牽制復忌其強遂有壓日之舉  
茲日電稱彼邦屢勝礙難相讓若照所請恐激民變云  
假如中國臺民粵民變何以處之或足抵制當稱謝因  
請設法相助隨問奉旨否對未但不便再商若從民變  
著想當有權衡等語查路透電報倭拒俄法諸國確係  
以恐激民變爲詞正與法外部之言相同倭既藉民變  
以拒諸國我更可藉民變懇諸國以拒倭昨臺撫唐江  
電稱臺民不願歸倭欲劫留崧與劉永福在臺同守僅  
許送出老母而家具不進行乘機欲亂有劫司庫械局  
之謀以有備而止廿八砍死中軍槍傷平民旋聞有各

國阻止之信目前稍定儻無轉機各官與良民均無生理矣軍火萬難收回存局者百姓不准提出不知各國究有切實辦法能阻割地否批准期到大亂立起電報驛站人皆逃散必致信息不通等語是臺灣民變其勢已成遼民亦必不服毫無虛假竊思恐激民變一說正合西例可冀西洋各國動聽且措詞最得體仰懇朝廷熟籌全局一面飭總署迅速與各公使商一面電許龔兩使迅與俄德英商電王使迅與法商或有轉機再英袖手不管必有隱情上海傳言倭與英約分與利益情形種種可疑此說如確我更宜與英商倭餌英以利我

亦能爲我許英者較厚英自舍倭助我矣卽不相助亦免助倭爲患似甚緊要英若作梗則大局處處窒礙矣恭候聖裁請代奏歌

致總署戶部

光緒二十一年四月初八日丑刻發

克薩借款係上海麥加利行經手在滬交銀專待總署錄旨照會英使電告該行初三初四等日已電請總署照會英使頃據上海麥加利行稱接駐京英使電未接總署明文不能交款事急餉竭譁潰可慮焦灼萬分仰懇聖恩敕總署速照英使令該行交銀再和戰大局未定竊恐事變正多兵事斷難速了若不急籌餉需禍

變不堪設想不勝惶悚待命之至請代奏庚

致總署

光緒二十一年四月初九日申刻發

初七日奉旨卽電王使之春遵旨與法切實商辦頃王使初八日來電云連日商外部伊云倭已有忱陽許減約陰聳逼批以機不可緩言次遂發電調兵輪分布基隆滬尾限日到請唐若法提督就商萬勿疑貳法并約西班牙協助另電詰倭德本勉從英私詐前臺電求英置之不理淡水英領事須防縱令批准法作不算等語謹飛電上陳法旣已發兵阻臺仰懇暫緩批准熟察各國大局再定辦法再法外部一經中使與商立即發兵

相助是俄英各國此時仍有可圖俄押遼而喜我以他地易之仍可歸我聞英已調香港兵船赴長崎顯係忌俄得遼大意不外或阻俄取遼或脅倭索臺兩端三國交忌中華若乘此求助當可互相牽制令倭約自廢伏望責成許龔兩使一切實商俄一切實商英予以實惠必爲我助務盡力圖之勿狃於局外常談失此機會大局安危不可不爭此數日迫切瀝陳恭候聖裁請代奏致總署

光緒二十一年四月初十日未刻發

傳聞十四日煙臺換約此舉一定實關大局安危各國現在商辦有已有辦法者有未得確音者但有強國出

爲排解總可挽回幾分伏懇宸衷務加審慎迅飭總署  
使臣力懇各國切商倭人展限數旬停戰議約以便詳  
加斟酌從容數旬各國必有真實情形彼此交忌必然  
相爭庶可因時變通相機補救此時懇各國助戰則難  
懇各國展期則易若倉卒換約各國皆怨歸咎於我豈  
不多樹數敵鑄成大錯悔不可追謹合詞籲請惶悚迫  
切請代奏之洞寶泉繼洵德馨秉衡景崧聯桂同肅蒸  
前因需餉甚急託龔使向英商借款久無定議洋款反  
覆太多恐致誤事故一面飭上海道劉麒祥向各洋行

致總署戶部

光緒二十一年四月十一日己刻發



商借德商瑞記允借一百五十萬鎊六釐息九六扣此外無行用二十年還先立草約擬俟龔處借款如不成再奏借瑞記之款茲據上海道電稱瑞記洋人李曼屢向該道稱早已備十二萬鎊匯到上海該外國行東在德國住月餘此事匯費電費及該洋東盤費共萬餘金若借款忽作罷論從何取償堅請速奏以便交銀如必退借則將此事用費息銀請該國公使向總署詢問負氣爭辯其意甚堅等語查瑞記之款扣數較輕以一百萬鎊計之較克薩九零五扣可省三十八萬餘兩以百五十萬鎊計之可省五十七萬餘兩出入太多因候龔

使借款準信未敢遽定又恐克薩反覆餉需無著故亦未敢辭退擬俟克薩款不成再議今瑞記既堅欲求借情詞迫切自係可靠扣數輕減甚鉅自未便棄之不用坐令公帑受此多虧且以後需借鉅款此時所借自以輕減爲宜瑞記係德商之款亦免與赫德借款有礙克薩款既爲赫德所不願擬卽借用瑞記款相應電奏請旨准將瑞記之款借用一百萬鎊卽由總署速告德國駐京公使電知上海該行及德國本行以便卽日提銀此款仍係江蘇鹽課釐金及籌捐三項歸還各海關作保上海道藩司俱用印惟瑞記議定須一百五十萬鎊

方肯借江省止借一百萬鎊其餘五十萬鎊既較匯豐減省戶部似可留用如歸部用應由關稅歸還其克薩之款只可作爲罷論仰懇聖裁訓示如蒙俞允并請飭總署速告德使請代奏真一

致總署

光緒二十一年四月十一日未刻發

前奉初七日電旨當已恭錄轉電王使之春欽遵與外部切實商辦在案茲接王電法外部以兩使在法爲疑停議兩日換約期迫一刻難緩請催署知照法國駐京公使轉電外部再參贊慶常駐法廿年深悉機宜并請奏飭龔使令慶常幫春辦事等語查王之春與法外部

商辦頗爲切實已議有眉目其辦法肯盡告王並爲我  
畫策立即派兵輪其得力已有明徵仰懇聖恩敕令  
慶常幫同王使辦事并飭總署速電龔使并知照法公  
使轉電外部俾得趕緊切實商辦請代奏眞二

致總署

光緒二十一年四月十三日申刻發

俄已爭回遼旅可見聖心既定一有展期換約之舉倭  
卽就範法確允保臺惟在朝廷令使臣切託洞保法必  
肯實力相助總之十四日換約之期務望展緩卽以臺  
灣民變爲詞倭已得利斷不肯自敗成約伏懇電旨令  
許使商俄王使商法一面致謝一面許以界務商務實

惠懇俄始終力助俾得徐議全約若不再切懇則俄除阻遼外不管矣懇法速派兵輪赴臺蓋界務商務乃於彼國家有益必懇助力大國雖不圖錢財斷無不圖土地之理所謂守局外之說乃係門面虛語萬勿爲其所愚此時惟英必須聯絡英之袖手明係願倭約得成英可借二萬萬鉅款以爲將來押我土地之謀且可需通商之益擬請電龔使速回英與外部商若能助我脅倭廢約我必仍向英借二萬萬以爲修鐵路買兵船各項機器等事之用仍多用英弁英工其新添之口准英人通商仍許酬以邊遠土地英必盡力總之朝廷若肯以

回疆數城讓俄以後藏讓英以雲南極邊地讓法三國同助則不惟臺灣可保倭約竟可全廢斷無戰事將來酌予倭數百萬兩除蘇杭不許外並准添數口通商與西洋一律辦法其餘各條概行刪去倭不能不聽三國雖讓以邊地不因此而加強倭之毒計盡窮筋疲力盡不能再爲我害此所謂不戰而屈人轉禍爲福轉敗爲功在此一舉並懇令總署一面與各國公使商一面電許王龔三使速辦參贊慶常甚有才并懇令慶常隨王見外部商辦求英助事若召問赫德必能爲中國出力籌畫有數日之堅忍即可固萬年之遠圖安危大計斷

在宸衷不勝急切請代奏元

致總署

光緒二十一年四月十八日戌刻發

十三日奉電旨當卽電王使之春與法外部密商慶常幫辦並知照龔使回英嗣接總署諫電亦卽電王遵辦茲王使電稱奉旨逾四日龔無行意此事首重神速法既允許當先擬定辦法請旨徒深焦灼等語竊思法確有保臺之意龔在法延宕太甚徒致王掣肘臺民洶洶萬不能棄之不顧惟有請旨令總署電龔遵旨速回英慶常留法令實力助王若僅由洞處轉電恐龔仍不肯行也臺事危迫唐撫屢電催不可再緩再誤激切待命

請代奏嘯

致總署

光緒二十一年四月十九日丑刻發

俄法德已爲我將遼旅爭回令倭換約展限七日已蒙  
旨暫緩互換乃以伊東一言恫喝倉卒互換伊藤允展  
限之電到亦已無及憤懣萬狀然事機雖已屢誤尙有  
補救一二之方蓋我約雖換倭斷不敢占遼旅必另索  
巨款抵補前議二百兆已足令中國民窮財盡矣豈可  
再加聞伊藤已向李相示意此乃倭寇窺極狡極之計  
萬不可又受其毒此時要策惟有堅持定見但託俄議  
不與倭議聞俄本有擬與倭商立退地約據索償費



允代調停之說蓋倭不能據遼乃俄之威非倭之讓讓萬不必感費自不必加倭既不敢踞俄又不肯占倭計既窮略爲敷衍即可仍歸於我即使俄不能代我減費倭亦必自圖了事若爲倭所愚開口輕許又耗巨款中國更不支禍患難言矣臺灣情形亦與遼相同惟有請敕龔使速回英敕王使速與法切商則臺全而不加鉅費與倭錢財雖輕於土地然譬如人身脂膏耗盡何以自存俄法既經出頭倭必無再戰之理伏望朝廷堅忍力持不勝大幸請代奏效

致總署

光緒二十一年四月二十二日午刻發

頃接臺民二十一日公電云全臺紳民敬電稟者臺灣屬倭萬眾不服迭請唐撫院代奏臺民下情而事難挽回如赤子之失父母悲慘曷極伏查臺灣已爲朝廷棄地百姓無依惟有死守據爲島國遙戴皇靈爲南洋屏蔽惟須有人統率眾議堅留唐撫暫仍理臺事并留劉鎮永福鎮守臺南一面懇請各國查照割地紳民不服公法從公剖斷臺灣應作何處置再送唐撫入京劉鎮回任臺民此舉無非戀戴皇清圖固守以待轉機情形萬緊伏乞代爲電奏全臺紳民同泣叩等語謹據情轉達請代奏禡

致總署

光緒二十一年四月二十三日卯刻發

王使之春來電云號電謹悉遵旨令慶常詢外部因何不願接見臺事有無辦法據復前商立約在未批准前華既遲誤三國勸倭展限華不能緩議院謂遼地全力已盡不欲從頭再舉故無可晤商非敢慢使又以恐德佔先步激之彼不爲動卽前日法使向署問辦法亦止探詢無他意查立約致緩之由詳前電誠可惜現仍令慶隨時探問一面候輪回華乞代奏春叩箇等語謹照轉請代奏漾

致總署

光緒二十一年五月初四日寅刻發

頃接臺電臺民忠義誓不服倭適唐撫奉旨內渡臺遂  
自約爲民會之國紳民蜂擁畢集不放唐行強唐撫留  
臺唐無可奈何允暫留保民禦敵並云該撫在此則各  
官可行該撫一人去則無一人可脫矣等語查臺民不  
願屬倭情形屢經電奏前奉旨撥濟臺餉五十萬及軍  
火各節已撥三十萬并酌撥舊槍并彈現既自爲民會  
之國以後餉械等事自未便再爲接濟以免枝節謹電  
奏陳明請代奏支

總署來電

光緒二十一年五月初五日戌刻到

奉旨張之洞電奏已悉臺事無從過問餉械等自不

宜再解免生枝節欽此微

又

光緒二十一年五月初十日戌刻到

奉旨現在和約既定而臺民不服據爲島國自己無從過問惟近據英德使臣言上海廣東均有軍械解往並有勇丁由粵往臺疑爲暗中接濟登之洋報或係臺人自行私運亦未可知而此等謠傳實於和約大有妨礙著張之洞奎俊譚鍾麟馬丕瑤飭查各海口究竟有無私運軍械勇丁之事設法禁止免滋口實欽此蒸

致總署

光緒二十一年五月初五日亥刻發

今日臺撫唐冬電稱以後奏事及行文臺地暨內地各省均仍用本銜及巡撫印臺儻倖存自仍歸中國其印旗係爲交涉各國結援而設免中國受牽累等語竊思此節甚關緊要謹代電陳查臺民依戀本朝不願他屬唐迫於臺民不能內渡唐現在辦法洵屬無可奈何之苦心事成則國家受其利不成則該撫身受其害諒蒙聖明鑒察儻能支持數月倭氣已沮當可與倭商贖臺之法臺若贖回所值甚多請代奏歌

致總署戶部督辦軍務處

光緒二十一年五月十八日已刻發

戶部眞電查詢息借瑞記百萬鎊已否交款此款四月

十七日奉旨後十九日卽提到十二萬鎊適鎊價甚低  
九六扣止合實銀七十八萬餘兩除遵旨撥臺餉三十  
萬及該行扣去礮價九萬餘兩外餘悉撥充防餉早已  
告罄現正陸續催提竊思此次軍務總由中國兵弱械  
缺以致受此重傷補牢之計不可再緩查此項洋款陸  
續裁撤江南防營餉項約需百餘萬現擬用德國洋將  
洋弁趕緊練陸兵一萬人已到德弁十六人一年約需  
銀一百餘萬開設大快槍廠一所大快礮廠一所約需  
銀二百餘萬創修江省江北之海州清江浦江南之金  
山衛濠浦金陵等處并改修鎮江江陰吳淞等處各礮

臺購礮築臺約需一百數十萬已有不敷此項借款仰  
懇聖恩敕部萬勿撥作他用不勝大幸請代奏囑

總署來電

光緒二十一年五月二十日午刻到

奉旨張之洞電奏已悉據稱瑞記借款已提用十二  
萬鎊餘擬留爲裁撤勇營及練兵開廠築臺之需請  
飭部勿撥他用等語現在善後諸事皆應次第辦理  
惟籌款艱難亦須通籌全局方能舉辦張之洞所擬  
用洋將練兵萬人開設槍礮全廠修改各處礮臺需  
款甚鉅著將一切辦法及需用款項詳細聲敘具摺  
再奏請旨辦理其湖北製造快槍現已造成若干是



否合用著一併奏聞欽此效

致總署

光緒二十一年五月二十九日卯刻發

去年海防戒嚴長江各口禁米出洋嗣因北路采辦軍米甚多經前督劉於十月內奏明鎮江上海准運米出口蕪湖仍禁以免漏釐而顧餉源部議復准茲值海防解嚴蕪湖關道稟請開禁江甯藩司釐金局鎮江關道均稟請不可開禁查江南運米出口歷來皆係自鎮江關裝輪販運上游蕪湖一帶之米皆用民船運赴鎮江銷售赴蕪湖者寥寥光緒十一年始有粵商多家徑赴蕪湖多開米棧礮房裝輪下運茲查鎮江關自上年九

月十五日起至本年五月十五日止計八箇月鎮江關米稅一項較往年多收四十三萬餘兩而江甯江蘇兩省於鎮江以上有釐金卡三處共多收米釐二十餘萬兩通計一年鎮關米稅約可增多六十餘萬兩甯蘇三釐局米釐約可增多三十餘萬兩兩項共增約一百萬兩於安徽之米穀釐金常稅收數依然如故絲毫無損且由皖至鎮皆用民船裝載於小民生計亦甚有益惟蕪湖洋關米稅無收查厯年蕪湖洋關米稅少者二十餘萬兩至多者三十八萬兩今若准輪船至蕪湖運載則鎮江關米稅頓減而甯蘇米釐三十餘萬金全歸焉

有當此籌餉萬分艱難之際若棄此不擾商民之鉅款實多窒礙難行特是蕪關既無米稅止有洋藥百貨收數既絀撥餉難籌謹與司道等熟商擬請照蕪湖關米稅最多三十八萬兩之數由鎮江關照數撥補於今年部撥蕪湖京協各餉內由鎮江關照數代解三十八萬兩如此則蕪關稅餉有著而江省釐金無損至蕪湖關稅司及官吏司事巡丁人等辦公經費擬卽由江省三釐局查照向來蕪湖關需用之數照案如數提出津貼該關以資辦公擬請照此試辦一年屆時體察情形再行奏明辦理洞於蕪鎮兩關同爲轄屬毫無偏重派員

分投確查詳加諮訪具悉實在情形不敢不通籌兼顧以期商民無損稅釐有益是否有當請旨遵行再此後江海鎮江九江江漢各關各種米糧應請一律弛禁准其查照定章販運合併陳明請代奏豔

致總署

光緒二十一年五月二十九日卯刻發

奉鈞署陽電令前護臺撫唐景崧設法脫身卽歸以免枝節遵旨轉達等因當卽轉達去後茲該前護撫已遵旨內渡於本月二十七日到江甯本日已晤面懇爲代奏請旨應否仍行入京陛見候旨遵行請代奏豔

總署來電

光緒二十一年五月三十日申刻到

奉旨張之洞電奏已悉唐景崧著卽休致回籍欽此

卅

致總署

光緒二十一年閏五月十二日辰刻發

奉旨保薦使才當係選擇出使日本人員查川東道黎庶昌老練持重兩次出使東洋熟習情形該道學問素優日本文人從游奉爲師範者甚多因此該國大臣亦加敬禮若黎再往藉其舊日聲望尙不致爲彼族所輕侮此時姑且以老成雅重者虛與委蛇使其政府不能遽測中國之情實似爲合宜又查有奏調江南差委湖南候補道陳允頤曾以隨員理事等官到過西洋東洋

朝鮮各國明習洋情才具通達無滯尙能斟酌輕重亦可備使才之選謹舉所知恭候聖裁請代奏文

致總署

光緒二十一年閏五月二十八日午刻發

古州鎮丁槐聞其營卽將裁撤查該鎮忠勇果決勤練耐勞曾經洋戰熟習營壘情形且久在邊軍不染腹省將領習氣自去秋以來洞所見將領甚多如該鎮之逃避艱苦赴敵迅速者實爲罕有古州偏僻平靜無事此次北來糾合舊部得力將弁頗多奔馳八千餘里若將該軍遣散未免可惜該鎮回黔後緣營無事亦不足盡其長竊惟今日可靠將才甚少有用者似宜置之海疆

仰懇聖恩可否飭丁槐赴江南差委卽率本部弁勇  
來江如蒙俞允洞當與熟商除裁撤者遣回外酌留數  
營在江省認真操練擇要屯劄以備緩急徵調必有實  
用洞當酌裁江省現有之營以抵其數並不添餉洞爲  
籌大局儲將才起見伏候聖裁請代奏勘

致總署

光緒二十一年六月初五日亥刻發

奉旨飭籌日本新約改造土貨設法補救一節連日正  
在督飭司道詢訪紳商力籌妥法惟外間並未接到總  
署頒行條約刊本雖有傳鈔不知字句是否相符商務  
條約字字皆有狡謀深意仰懇敕總署將中日新約第

六條及他條有關商務者電示以便速籌覆奏請代奏  
歌

總署來電

光緒二十一年六月初一日午刻到

奉旨前因日本約內改造土貨一節電諭張之洞等  
籌商覆奏現在商約尙未開議其中關繫國計民生  
應如何補救之處著張之洞奎俊趙舒翹廖壽豐併  
豫爲籌議迅速覆奏欽此豔

致總署

光緒二十一年六月初九日亥刻發

養庚兩電兩次奉旨飭保興辦鐵路之員并令將清江  
一路熟籌具奏查鐵路爲今日要圖富強兼資勢不可



緩惟此等大舉必須通籌全局將此路利益何在需費若干幾年告成如何籌款如何發端如何推廣籌有成算始可下手舉辦洞於閏月二十七日有條陳時事一摺內一條專言鐵路計本月半可到京查鐵路以由漢口至蘆溝一路爲最要此路四通八達必宜先辦其餘枝路由此而推如此方有綱領有次第若清江一路諸多不便查湖口以上外洋大兵艦不能到若海州距清江二百餘里毫無險隘離海太近易被敵截弊一鄰近輪船運載罕利弊二路之東餘地無多不能拓枝路之利弊三鐵路必受運一切深藏難出之物然後有利情

江運道久通蘊藏鮮少弊四蘆漢一路目前可用湘煤將來可通晉煤磁州一帶皆有煤鑛東路距煤鐵出產之區太遠不便資用弊五築路以碎石爲第一要料西路沿途皆有東路取資頗艱弊六一國之內幹路不能多設創始偏東則近西幹路不能再舉將來引而加長如南達湘粵西達川陝均遠弊七黃河下游遷徙無定弊八直隸之津南山東之湖路常被水淹路虞冲損弊九清江一路仍以天津爲歸宿海口兵衝實不穩便弊十幹路旣成自必多作枝路西通潼關東通濟南濟甯北通山西南通湘粵由鎮江乘輪至漢口止兩三日若

專辦東路則無大益此皆詢考洋人熟習鐵路者所言至籌款之法外洋風氣若爲辦鐵路借款既易利息亦輕可卽用鐵路作押不必海關作保尤要者鐵路辦法必以勘路繪圖爲先宜速募洋工師數人將蘆漢一路詳切測勘並委員偕往照料估工計費既定再行舉辦惟此路必須一年方能勘竣初勘詳實則將來或自辦或包辦皆有成算而且迅速德國鐵路最盛獲利最饒若託外部向鐵路衙門揀派得力官員來華代我測勘尤善至承辦此舉之員必須廉潔無私而又通達時務之員最難其選本日另電奏陳總之此事關係國家大

利害定地用人務宜慎之於始近年習氣凡稱知洋務者大率皆營私漁利之徒斷難專任總宜以廉正者爲主持以敏幹者供策遣庶可無弊聞各國洋人紛紛赴京向其公使處營謀承辦鐵路不下數十人此皆只圖謀利不顧中國全局伏望朝廷詳加權度萬勿輕允其請不勝翹禱洞仰蒙垂詢不敢不竭誠直陳請代奏佳總署來電

光緒二十一年閏五月二十二日申刻到

奉旨興修鐵路爲方今切要之圖亟應舉辦惟責任至重必操守廉潔明幹有爲熟諳情形之員方能勝任著張之洞悉心遴選奏保數員以備簡用鐵路支

幹前據張之洞條奏頗爲詳晰著專由京至清江一路作何修造之處再行熟籌具奏欽此養

又

光緒二十一年六月初八日申刻到

奉旨前諭張之洞奏保辦理鐵路之員以備簡用會否遴選有人著該督卽行覆奏欽此庚

致總署

光緒二十一年六月初九日亥刻發

奉旨命洞奏保辦鐵路人員此事關係大局必須才識兼優操守可信者始克勝任查有前臺灣布政使于蔭霖品行端方才識明決事必核實應變有方又前內閣學士陳寶琛志趣遠大條理精詳究心洋務果銳有爲

該兩員若蒙朝廷加以委任必能心存君國絕不藉此牟利營私則皆相同此事任重款鉅凡巧滑好利之流皆不相宜謹舉所知仰候聖明裁擇請代奏佳二

致總署

光緒二十一年六月初九日子刻發

外國鐵路要義利商與利兵兩大端並重蘆漢幹路兵商兼利此爲中國鐵路大綱此外尙有一路可以興辦查由上海造鐵路以通蘇州而至江甯旁通杭州此路最有利於商貨物蕃行旅多道路平大河少道里近成功易獲利速又可杜外國行小輪之害於江南富民籌餉之道均有益借款亦不難且去年辦防以來蘇杭精

華力籌保衛然各處距海皆不甚遠內河紆遲實難得  
無數重兵精械分防援應若鐵路既通江甯蘇杭聯爲  
一氣外遠內近可以隨方策應省兵省餉是於兵亦有大  
益洋商勸開此路營謀代造者甚多其利厚可知朝廷  
如有意興辦擬派員帶洋匠測勘酌擬籌款辦法再  
奏明請旨辦理伏候聖裁訓示遵行請代奏佳三

總署來電

光緒二十一年六月十一日戊刻到

奉旨張之洞電奏均悉鐵路由蘆至漢該督從前卽  
主是議究竟辦法若何購路造軌一切需費若干諒  
已籌有大概卽著詳晰電覆欽此真

致總署督辦軍務處

光緒二十一年六月二十七日未刻發

南洋必需海軍而現在各船皆木質難禦敵仰懇聖恩飭調琅威理來華令先到南洋察看情形籌議應設戰艦幾艘或大或小若何配搭布置然購艦款巨恐一時難集擬令先籌擬教練人才之法就現有兵船擇其較可用者卽令該洋將督飭練習嫻熟以備一有新船卽可駕駛應用以免倉卒乏才且不致虛糜養船經費實於海防有益伏候聖裁訓示請代奏感

總署來電

光緒二十一年七月初二日酉刻到

奉旨張之洞兩電均悉琅威理已允來華俟該洋將



到後再定辦法欽此

致總署

光緒二十一年七月初七日戌刻發

俄國建造西伯利鐵路意在網羅亞洲東方一帶貿易此路一成凡歐亞相通之英法德三國公司輪船無不大受其損蓋行旅及細貨之取速達者莫不舍舟就陸惟賸重大貨物而又不求速達者尙由船運耳先聞總署允其假黑龍江南岸造鐵路以接於海參崴已成之路可省千里近英文新聞紙又言中國允其沿鴨綠江而南建造鐵路以江口爲水陸銜接之所查俄國久謀在東方覓一冬凍不久之海口今以鴨綠江口畀之此

路一成俄可獨擅亞洲東方貿易轉運之權今中國方謀以鐵路自強查鐵路之利凡分二大項一收本國往來之利一收外國貨物經過之利中國目下力雖未逮日後必須擴充收外國之利而後路愈富國愈強中國居亞洲東方此一帶貿易之利中國應收之俄國不應奪之也且遼東根本重地後患甚大不可不防爲今之計惟有速與議凡自俄境入華境以後無論鴨綠江南岸黑龍江南岸達於海口其鐵路皆由中國修造俄國運貨運兵皆可行用惟運兵須議定章程限制造路之費卽以本路作押不須海關其款卽託俄代借彼亦可

有霑潤我有此路可操縱各國經過貨物之利權運價多少由我酌定其利甚大既可振中國富强大局且防無窮後患不可不竭力爭回不勝急切此舉關係東方海面商務事涉南洋非敢越俎俄人是否允許可否諭知洞處以便另籌辦法伏望聖明鑒察請代奏陽一總署來電

光緒二十一年七月十一日酉刻到

陽電悉俄假道修路并未來商真

致總署

光緒二十一年七月初七日戌刻發

奉旨籌議倭約第六款補救辦法謹擬十九條一甯波口岸並無租界名目洋商所居地名江北岸即名曰洋

人寄居之地其巡捕一切由浙海關道出費雇募洋人允當今日本新開蘇杭沙市三處口岸係在內地與海口不同應照甯波章程不設租界名目但指定地段縱橫四至名爲通商場其地方人民管轄之權仍歸中國其巡捕緝匪修路一切俱由該地方官出資募人辦理中國官須力任諸事必爲妥辦不准日本人自設巡捕以免侵我轄地之權二製造貨物自係單指通商口岸而言華文有含混內地之意須更正任便兩字太寬宜議定限制三出示曉諭產貨地方須先完坐賈釐捐方准售賣無論洋商華商一律辦理日本人在內地購買

土貨只可暫行租棧存放不准自行開行不准自向散戶收買以免奪我產貨地方坐賈釐稅且杜華商影射洋票漏釐四內地收買土貨准其租棧暫存不准購買房地懸掛招牌所買土貨務須運載出口不得在內地轉售洋貨運入內地須大宗販賣不准零售租棧應給地方公舉費用須照華民房屋一律攤派五日本人在內地製造土貨出廠後卽完正稅一道運出通商地界無論行銷內地及運出外洋均須再完半稅一道六通商章程善後條約第二款所載各項器用食物進出通商各口皆准免稅原爲洋商在各口岸自用爲數無多

故邀寬免若作貨物轉售應照值百抽五納稅不得藉口家用雜物蒙混免稅七日本輪船不准販運食鹽八米穀銅錢不准販運出洋九軍火禁販非有官買執照不准進口十日本輪船不准拖帶民船免致影射漏釐十一日本行內河輪船尺寸大小時刻早晚須有限制以免傷礙民船十二日本輪船只准到指定口岸裝卸人貨不准沿途起卸搭載十三內河輪船應收船鈔須較長江加多以備修理河道之費十四日本人入內地辦貨賣貨不准薙髮改爲華裝違者查出卽作爲華人照奸細治罪十五雇用華民工作須按日給值聽其自

願不得立約限期抑勒作工更不得鞭撻虐待十六裝  
運機器製造各物須無傷民命方能照准不得以任便  
兩字藉口十七船隻非日本商人購置行戶藉日本商  
資本不得懸挂日本旗若有冒名包庇查出卽行充公  
十八製造各廠如有藏匿犯法華人一面由地方官知  
照領事一面卽派人到廠緝拏廠主不得袒庇如廠主  
確知爲好人須照洋例存銀作保到審訊日交出候審  
十九廠內如有華工滋鬧毀傷機器廠屋地方官只能  
辦犯不能賠償若僅罷工細故應由廠主自行調停官  
不與聞此外如再有籌思所及之處當再續陳請代奏

陽二

致總署

光緒二十一年七月十八日辰刻發

蘇州通商奉旨籌議招商多設織布織綢等局及內河設小輪就產貨地方先抽釐金三節均爲維持國計民生要事必應力籌兼顧謹分爲三電覆陳兩月以來夙夜焦思邀集官紳商董反覆籌議並向蘇滬商賈洋人廣爲詢訪均謂空言勸導終恐無益必須官助以本方易集事惟官款無從籌措近始思得一策此次息借商款共二百二十六萬五月已還利一次十一月卽應本利併還擬卽商明借戶以此款移爲開辦商務局之用



按期將利銀仍給借戶其本銀卽轉借與商務局令紳商公同承領出具保結并邀殷實錢莊當店二十家作保凡有願開辦機器仿製洋貨者借給公款至多不得過十萬餘令該商自籌海關票二年半後官款還清其息銀卽由商務局認還減爲年息六釐分十年還清此係以本地紳商之款濟本地紳商之用似尙自然公家絲毫不支其願收回本銀不肯借者聽之至商利之事機器纈絲爲一大端其餘如製洋糖洋瓷器洋蠟洋火柴洋水泥洋針洋呢氈洋酒之類銷路皆極旺均可仿造以敵洋貨其纈絲廠擬設於無錫兼開繭行此外各

廠擬設於上海現經上海道黃祖絡籌議查有法租界之南官地甚廣擬修治道路以備各項新設機器工作各廠其願設於蘇州等處亦聽之洞手書章程數千言詢商蘇滬紳富舒翹復加切商昨日得復電以爲可行至機器織綢徧詢洋商土綢應用何機洋綢何式易銷機價若干皆不能確知已令函詢外洋接續酌辦竊查絲爲綢之源若我多設機器繅絲廠已盡擅絲利卽與織綢無異矣至織布紡紗每一廠機器廠屋活本約需銀百萬若欲多設鉅資難籌似只可另議謹先覆奏如蒙俞允擬卽曉示紳商妥擬章程再行奏明設局開辦

再此事因須籌有切實辦法方敢覆奏合併陳明請代奏之洞舒翹同肅洽一

致總署

光緒二十一年七月十七日戌刻發

內河設小輪一節飭上海道黃祖絡勸辦眾商願者極多現擬分爲六路由滬至蘇爲一路由滬至杭爲一路由蘇至鎮江爲一路由鎮江至清江爲一路由滬至崇明海門通州爲一路由滬至甯波台州爲一路後三路非日本條約所有因商人所願又便於民故一併議辦現據該道稟已有人集股承辦無須發給官款每年除該船經費外願以餘利一半報效充餉惟請目前照完

釐金以後如洋人小輪開行時彼止完一正稅或再完半稅相去懸絕則華輪無人雇用懇比照洋輪章程一律等語竊思果如所請則內河釐金全減爲洋稅斷不可行查內河小輪之利全在拖帶民船剝船運貨洋人小輪自應照長江章程不准拖帶民船剝船據稅務司言此必可行但能堅持舊章定約且限制每河止准幾隻則華輪自可照舊完釐不知總署議約如何伏望諭知以便遵飭定議趕造請代奏之洞舒翹同肅洽二

致總署

光緒二十一年七月十八日辰刻發

就產貨地方先抽釐金一節查蘭絲棉花兩大宗繭及

絲向係於賣出時併抽一道浙絲亦同棉花視運行遠近釐金多少不等現擬飭江北江南通州等產花之處皆責令花行分別發銷何地將經過釐金併一次完納其爲數較重者酌予核減蓋如此辦法透漏自無且向來釐卡多係減成招徠今併抽則雖減而實數無損此外各貨屢與甯蘇兩釐局熟商據云類繁路歧一時難得良法且尙非洋人注意只可從緩陸續酌議惟我於花行併抽日本商人若向散戶收買則仍無益查日本新約只云暫租棧存貨並無准其開行字樣惟有詳約切實議明不准設行收買一面密飭地方官賣花皆須

歸行發售彼自不能買之散戶卽間有向散戶私收總  
不甚便本日詢造冊稅司葛顯禮云開行一層必可禁  
止至林董來詢先抽釐金一節總署似可告以此乃江  
南因釐卡太多累商故量加核減而併抽之此中國恤  
民內政與外國無涉蓋此事終不能不使洋人知不如  
明告較爲得體且核減亦是實事請代奏之洞舒翹同  
肅洽三

總署來電

光緒二十一年七月二十日酉刻到

奉旨張之洞趙舒翹電奏悉江蘇息借商款二百二  
十六萬著准其借給商務局分十年歸還惟開辦機

器仿製洋貨原爲抵制外人起見該廠商人亦須自籌資本不可全用官款致外人藉口於官飭商辦轉生枝節小輪船專走內河崇明甯波兩路則涉外海可不必辦所請完稅免釐金萬不能准棉花就行抽釐甚爲扼要著卽照行總之此事務在得人該督撫當協力同心於興利之中先籌防弊之法是爲至要等因欽此

致總署

光緒二十一年七月十八日辰刻發

江蘇土貨大利在棉花蠶絲兩端電旨令多設織布織綢等局最爲扼要實深欽服彼族欲盡奪江南商民生

計必須以全力爭之查織綢機價工費一切辦法中國向未辦過已函詢外洋竊思絲爲綢之源紗爲布之源若廣設機器繅絲紡紗廠卽與織布織綢無異上海向有華洋絲廠華商紗廠獲利頗豐絲廠利三分紗廠利二分若有鉅款大舉卽可盡收利權假如設絲廠五所每廠五百盆計三千盆通年用繭二萬三千五百擔出絲約五千擔中價值銀三百餘萬兩廠竈繭本工費需二百四十萬兩則江蘇一省之繭可全收盡矣去年售繭八千餘擔本年售繭二萬三千擔全供上海絲廠之用緣賣繭較賣絲省工以後絲廠多則賣繭者必逐年



增多開辦第一年可先設一千盆以後按年視繭數遞增假如設紡紗廠五所每廠八萬一千錠計四十萬五千錠通年出紗二十四萬包值銀一千二百四十萬兩機器廠屋花本工費需銀一千萬兩則每年外洋進口洋紗之數除上海原有各紗廠外此五廠可全敵而拒之矣貿易冊每年洋紗進口值銀一千七百餘萬兩現上海湖北華洋紗廠實有不過二十萬錠約值銀六百萬兩照此辦法日本雖欲在江蘇設機縑絲固已無繭可買雖欲設機紡紗固已無路可銷不獨東洋計且且西洋之紗亦必不來洋商絲廠亦不能再添矣或謂浙

江之絲多於江蘇數倍焉能盡收不知浙人向不賣繭  
現聞浙撫廖勸諭丁廩兩紳設繅絲廠兩所各借官本  
五萬試辦以後售繭之風漸開則浙廠亦可漸增以上  
辦法共需一千二百四十萬兩第一年絲廠可少設約  
需銀一千一百萬兩華商力薄上海已稟定各紗廠至  
今定機器者僅一半空言勸導斷不能成若欲豫杜狡  
謀非官助商力不可竊擬官代商借七成令商自籌三  
成或可速成擬由官代借洋款五百萬兩息六釐合之  
江省息借商款二百萬兩并仰懇將戶部所借克薩洋  
款撥給一百萬兩共得八百萬餘歸商籌此項洋款可

不必海關作保卽以各本廠作保兼以招商局作保商局值五百萬華洋皆知但須奉旨後由各官蓋印擬設一商務局請旨敕令江省公正有名望之大紳皆入局總理局事商由紳保事由商辦領款由紳商出具保結兼邀大錢當數十家作保并委司道督辦官稽察而不擾商權屆期商還總局局還洋人設有虧欠紳商錢當公同借墊籌還再爲收繳一省同心數十萬當不甚難初年須籌款次年以後除還洋款本利外尙有盈餘此乃官紳商合力保護江省商民生計遵旨專就織布織綢設法必欲力障狂瀾惟需借巨款官紳擔承甚重事

不易辦且人多議洞好借洋款故擬此策而不敢上陳  
不得已又思得一小辦之法已於本日第一電會奏繼  
思電旨諄切力保利權既籌有盡據絲紗利權之法爲  
計雖拙不敢不上陳以備一說有無可采恭候聖裁抑  
或戶部籌有良法鼓勵眾商無須籌借巨款尤所深願  
自當遵行請代奏治四

致總署

光緒二十一年七月十八日戊刻發

奉旨飭籌蘆漢鐵路如何辦法需費若干等因連日悉  
心籌畫熟商西人及曾出洋人員查造鐵路以勘路繪  
圖估工爲第一義外洋各國皆專設有鐵路衙門尊如

六部其長官略如尙書鐵路惟德國造最後而工最精  
利最厚此舉必須電出使大臣商託德國鐵路衙門派  
精熟誠實之員數人并酌帶驅策之人來華代我勘路  
除蘆漢一路外如有將來必須接修之幹路必修之枝  
路亦應趁此一氣勘明以便通籌各路分起四出測勘  
卽蘆漢一路亦可南北分勘方可迅速大約至速必須  
一年俟勘畢繪圖後注明道里議定路寬若干鋼軌用  
若干頓重者估定橋梁車棧及火車貨車客車之數石  
印數百紙分寄外洋各國工作大廠令其估價限若干  
日密封寄華彙齊折封擇其價廉而又係著名大廠者

令其承辦包定工料用費若干年限若干不如式者如何議罰外洋卽係如此辦理洋廠只包辦工程其款悉由官籌不必令兼攬借款其買地彈壓等事須有委員經理至工料地價一切平地每里在萬金以內山河每里在萬金以外道里及需費確數須俟洋員勘估方確若籌款一節不外借洋款一法華商集股斷無其事幹路成後其路短而利厚之枝路或有商股願辦外洋惟借款修鐵路最爲樂從款鉅而息輕以爲此債最穩故也卽可以本路作押無須海關作保分還年限宜稍寬以舒氣現詢上海洋行有願息四釐半者惟此款太鉅

應請飭使德大臣許侍郎向外洋銀行議借因許使操守最可信於託辦船械物料各件從不沾染經手之費也總之鐵路爲今日自強首務無論運兵運餉之便卽爲富民籌餉計亦惟鐵路爲最大遠勝開鑛等事德國境內鐵路進款餘利每年四千兆馬克合銀十三萬萬兩是其明證蓋鐵路之餘利尤在載人不僅在運貨近時論者尙多隔膜竊謂朝廷旣決意興辦必宜就此通籌全局將應修各路一齊勘繪估計然後體察緩急審時量力次第舉行免致屢勞籌計外洋見中國有此大志已可隱戢欺陵護鄂督譚已奉旨委員查勘湖北至

江西廣東之路自係朝廷有意將幹路接修至粵此路若能開通則中國氣脉大暢惟大庾嶺須洋匠測勘有何修造之法應以蘆漢一路接至黃梅在九江過江經江西抵廣東省城爲幹路此外應修者尙有數路一由河南幹路孟津以西分修枝路入潼關至陝西省城一由許州以北分修枝路至河南省城以達濟甯清江一由磁州以北分修枝路在臨清州以北作橋跨運河至山東省城以達煙臺威海又一由上海修一路經蘇杭鎮江以達金陵另爲一事此路行人最多故利最旺洋人極羨願承辦此路而於江浙海防調兵運械亦有大



益一由通州造至張家口此路據西人云每年此路出口茶進口羊駝毛牛皮牛乳各貨計車駝價甚巨修成鐵路亦有大利可富蒙古德國洋員應請多募數人將六路一併分投勘估幹路應將河北河南江南嶺兩分爲四段測勘到華後計一年餘即可勘畢再行請旨定議先修何處勘路得人則雖多費十數萬將來所省不止數百萬此費實不能惜蓋勘造鐵路一事中國委員所勘不能爲據高山能否開通陡坡能否直上橋梁能否建造城市若何繞避均須洋員習此者方解其法至黃河能否造橋或卽用船過渡均由洋員勘議此時未

勘估興工以前似不必先派修路之員既係包工則修造以洋匠爲主可無須另設專員竊謂宜請欽派總理鐵路大臣一兩員既駐京城必須清正有人望者爲之不在熟習工程與否設一公所令擇數員爲總辦隨同籌畫至明曉鐵路者亦須訪求數員以資詢考官階不必甚大庶免蒙混漁利鐵路所過省分卽派該省督撫爲幫辦委員經理買地彈壓保護看守等事但委員不得掣肘至所用鋼軌鐵料自應先儘湖北官局所造給價購用不敷者購之外洋如此辦法工可堅好費無浮糜時不延曠法簡易而有把握此乃國家大政華商斷

無此巨款且亦不可令商操此道路之權若請集股者  
必係洋商託名附股所有自請集股承辦之官員報效  
包攬之洋商皆係貪狡妄人務望駁斥不理再洞前奏  
開鐵路一條原擬令小國商人承辦分餘利與中國細  
思究有流弊仍以我自籌款只令洋匠包工爲妥謹聲  
明更正請代奏嘯

致總署

光緒二十一年七月十九日午刻發

日本新約第六款從上海駛進吳淞江及運河至蘇州  
府杭州府等語此條內運河二字殊未明晰當係指由  
蘇州至杭州之內河而言抑係指由鎮江至蘇州之運

河竊思上文旣承從上海駛進吳淞江之下自當係由蘇入杭之路非鎮江至蘇之運河也洋文只係河渠之意并非專指運河務宜於詳約內指明河道經過地方免致牽混請代奏并祈迅賜電示以便籌畫小輪及釐金事宜切禱效一

致總署

光緒二十一年七月十九日午刻發

蘇州創辦通商諸事繁難此係發端尤關緊要江省熟悉洋務商務之員甚爲難得查有前廣東候補道楊樞曾到東洋西洋充當隨員熟習洋務精細老練且通曉洋文洋語該員係廣州駐防現丁憂在廣州擬請旨飭

調該員迅速前來江南差委以便飭籌辦一切再浙江海甯州知州李圭久在浙海關當差曾經出洋於商務最爲究心蘇杭商務事多貫通昨與浙撫廖商調該員來江籌辦通商事宜俟諸事議有端緒卽令回浙廖已復允飭其卽來蘇州及江甯因李圭係實缺人員合併奏聞請代奏效二

致總署

光緒二十一年七月二十日戌刻發

甘回猖獗蔓延深恐擾動大局必須厚集兵力迅圖撲滅甘督楊護陝撫張疊電告急懇江南協濟軍火已撥毛瑟槍二千枝彈一百萬來福槍二千枝車礮二十尊

格林礮十尊并火藥礮彈銅帽等分解濟用甘督楊屢電商湖北請撥兵協剿鄂省實無可派撥查昨接欽差劉咨江南徐州鎮陳鳳樓馬隊三營共七百名奉檄回徐州而徐防已募新營填紮吳提督鳳柱馬隊三營共五百名亦奉檄回襄陽鄂省亦因已募馬步新營填剗正以去留爲難江楚兩省情形正復相同之洞繼洵往復電商竊思有一策甘省正盼援軍馬隊利於西北遠勝步隊到甘亦迅速陳吳所部皆係江淮以北人西路勦匪正爲合用擬請旨卽飭徐州襄陽兩軍馬隊六營共一千二百名馳援甘肅聽甘督調遣勿庸回襄回徐

陳軍現尙在天津未啟行可卽由津西行吳軍先已拔隊赴襄俟到襄後卽令其馳赴西安兩軍會齊惟本日適吳提督過江甯經之洞面商據云兩軍各數百人須合成一軍方有益分爲兩軍則力單權分不相統攝恐難得力至該提該鎮應派何員統率前往聽候奏派等語查所言亦甚中理之洞體察陳吳兩員陳鳳樓似尤相宜可否卽派陳鳳樓統率前往抑或派吳鳳柱前往統候聖裁其兩軍餉乾月需約共一萬四五千金江南擬認三分之二湖北認三分之一但議定只供六箇月餉六箇月後如回匪尙未平再商甘督奏辦留則甘自

出餉或部撥專餉不留則遣回大約數月後該兩軍剿賊是否有效已經顯著如能殺賊立功則將士均係精銳自應帶回仍劄原防將募填之勇裁汰如並不得力則徑將此兩軍全行遣散免至帶回江南湖北永遠糜餉此舉就現有之馬隊赴甘省之急援藉此亦可考驗兩軍優劣有無用處以定去留似於西北大局不無裨益如蒙俞允陳鳳樓一軍所用間有前膛槍江南去冬解津有新後膛馬槍一千枝北路尙非急需應請敕欽差劉直督王查明撥給七百枝如已發他營卽酌量另配足數其馬匹亦併查明如多有內地馬卽望將他防



營新買北口馬撥換務令槍馬一律精壯遠征方能得力謹合詞電奏請旨遵行請代奏之洞繼洵同肅號

總署來電

并致鄂督  
申刻到

光緒二十一年七月二十二

奉旨張之洞譚繼洵電悉甘回煽亂經張之洞籌解槍械具見力顧大局所請將陳鳳樓吳鳳柱兩軍調甘一節陳鳳樓無所表見吳鳳柱屢被參劾且所部在津滋事均無庸調往現派陳湜帶十營并方友升五營援甘當可得力張之洞條陳鐵路辦法語太恢張一時難辦至所云譚繼洵奉旨查勘由鄂至粵等處鐵路則並無其事何緣妄傳著查覆張之洞近來

電奏辭多繁冗嗣後如有電奏非數百字可盡者卽具摺以聞欽此養

致總署

光緒二十一年七月二十二日亥刻發

本日奉電旨飭查覆護鄂督奉旨勘由鄂至粵鐵路一節竊查六月二十二日接護鄂督譚電稱延寄準學士奏鐵路由天津至鎮江至漢口過江西而達廣東爲一路湖北已委員自江夏至興國又自漢陽至黃梅過江西界止兩路分投查勘已電咨德中丞派員於交界處會商接勘其信陽樊城鐵路亦已派員往查等語洞因此誤會不勝惶悚再洞前電奏募洋員分勘六路原奏

聲明體察緩急審時量力次第舉行免致屢勞籌計外  
洋見中國有此大志已可隱戢欺陵等語各路所費極  
鉅誠如聖諭一時難辦洞意係請勘繪估工以備籌計  
非欲同時並舉措詞未能明晰尤深悚惕合併聲明請  
代奏禱

張文襄公全集卷七十八終

深縣盧詒孫校